



**Les Fleurs Des Vies Des Saints Et Des Festes De Toute  
L'Annee, Suivant L'Usage Du Calendrier Romain Reforme**

Augmentees des Saints & Bien-heureux Peres Iesuites, de Saint Charles  
Borromeo, & de Sainte Françoise ; Avec le Martyrologe Romain, pour  
tous les iours de l'Annee ...

**Ribadeneyra, Pedro de**

**Paris, 1631**

ix La vie de sainte Leocade vierge & mart.

---

[urn:nbn:de:hbz:466:1-75777](https://nbn-resolving.org/urn:nbn:de:hbz:466:1-75777)



8. **D E C.** deu à la dignité de Mere de Dieu : Nous de-  
uons faire de mesme : si nous sommes zelateurs  
de la gloire de Dieu, & deuots de sa tres be-  
niste mere. Oū est le Chrestien, qui pouuant at-  
tribuer pieusement ceste grace à la Vierge, la luy  
voudroit refuser. Qui pouuant croire qu'elle l'a  
eue, ne s'en reiouyit? ne luy en donne l'hon-  
neur, d'auoir esté preferuee par vne exemption  
singuliere de ce Seigneur qui l'a choisie pour sa  
mere, & l'a esleuee au sommet d'une si souuerai-  
ne dignité? Et puis que nous le pouuons non  
seulement faire sans crainte, mais que c'est que  
le mieux, que nous la celebrions promptement  
& allegrement, pour nous conformer avec le  
consentement de l'Eglise vniuerselle, celuy qui  
y manquera fera voir le peu de deuotion qu'il  
porte à la Mere de Dieu, ou la presomption de  
son propre iugement, avec le mespris de celuy  
d'autruy. Supplions nostre Seigneur qui choisit  
ceste Dame, & nostre royne pour sa Mere, qui la  
preferua, & decora de tant de dons diuins, que  
par l'intercession de celle qui fut exempté de pe-  
ché, il vueille pardonner aux pecheurs & nous  
octroyer vne cordiale deuotion enuers elle, avec  
vne grande confiance en sa protection, attendu  
que personne ne l'a iamais serui affectueusement  
& deuotement, qui ne soit paruenue au port de  
salut eternal.

*La Conception de la glorieuse Vierge & Mere de Dieu. A Rome trespassa s. Eutychian Pape, lequel en diuers lieux ensevelit de sa main propre iusques à trois cens quarante deux martyrs, auxquels s'estant ioinct luy mesme, fut couronné du martyre sous l'Empereur Aurelian & enseuely au cimetiere de Caliste. En Alexandrie saint Macaire martyr n'ayant peu estre induit par plusieurs paroles du iuge à nier la Foy, ains persistant à la confesser tousiours plus constamment, fut en fin bruslé tout vif. En l'Isle de Cypre deceda s. Sophronie Euesque & Confesseur, qui fut merueilleusement soigneux à defendre les pupilles & orphelins, & tres liberal à secourir les souffreteux & affligés. A Treues s. Enchaire Euesque & Confesseur. A Lisieux s. Romaric Abbé, lequel estant le plus grand Seigneur de la Cour du Roy Theodebert, quittant le monde, surpassa plusieurs autres en l'observation de la discipline religieuse. A Constantinople saint Patapie solitaire, lequel fut renommé pour ses verus & miracles*

LA VIE DE SAINTE LEOCADE  
Vierge & Martyre.



A bien-heureuse Vierge sainte  
Leocade estoit natie de roled  
de fort bonne maison, & grande  
seruante de dieu. Elle fut appre-  
hendee par le commandement  
du President Dacian, qui com-  
me vne beste carnaciere ne se pouuoit assouuir  
du sang des Chrestiens. L'ayant fait amener de-  
uant luy, il luy representa la noblesse de sa race,  
au prix de la route & ignominie de ce qu'il appel-  
loit superstition des Chrestiens : s'efforçant par  
belles paroles, puis par menaces, par douceur, &  
par rigueur, de luy faire quitter la foy de Iesus-  
Christ, & adorer les faux dieux.

La sainte ne s'esmeut point de ce que luy  
dit le president, lequel n'ayant peu faire bref-

che dans ce cœur sacré par ses artifices, il la fit  
mettre dans vn cachot noir pour la tourmenter,  
& si cela n'estoit assez suffisant, pour la faire  
mourir cruellement: sainte Leocade se resioit  
de se voir conduire en prison, & remercia Dieu  
de ceste grande faueur qu'il luy faisoit, puis se  
tournant vers ceux qui la suiuoient, les larmes  
aux yeux; elle leur dit d'un visage riant, O sol-  
dats de Iesus-Christ, ne pleurez point de ma  
peine, resioyissez-vous plustost de quoy Dieu  
m'a fait digne d'endurer pour la confession de  
son nom. Aucuns disent, qu'elle fut rudement  
foietee auant que d'entrer en la prison, ce que  
l'on peut bien croire de la cruauté de Dacia: elle  
demeura quelque tēps en ce sombre cachot, où  
ayant entēdu parler de l'horrible boucherie que  
Dacian faisoit des Chrestiens, & des atroces  
tourments dont il auoit fait mourir la glorieuse  
vierge sainte eulalie de Meride, outree de dou-  
leur, elle supplia nostre Seigneur de l'appeller à  
foy s'il estoit expedient, de peur qu'elle ne veist  
la destruction de son Eglise, & la foy de la sain-  
te Religion aneantie. Dieu accomplit le de-  
sir de la sainte Vierge, & comme elle estoit en  
oraison, elle fit le signe de la Croix avec les  
doigts sur vne pierre qui y demeura gravé, & la  
baissant deuotement, elle rendit l'ame à Dieu.  
Son corps fut trouuē aupres de ceste Croix cou-  
ché par terre, qui fut inhumé par les Chrestiens  
du mieux qu'ils peurent. Elle deceda le neuuesi-  
me Decembre, l'an de nostre Seigneur 305, sous  
les Empereurs Diocletian & Maximian. Il y a  
trois Eglises en la ville de Toledo dediees à son  
nom, l'une où estoit sa maison, l'autre où elle fut  
mise en prison, & la troisieme où elle fut enter-  
ree. Quelques bons Archeuesques de Toledo luy  
ont tant porté de deuotion, qu'ils se leurent leur  
sepulture dans l'Eglise où son corps a reposé long  
temps, entr'autres eugene III. Alfonse & Iu-  
lien, trois grands Prelats: & du temps des roys  
Gots, on y celebra plusieurs Conciles de roled,  
qui ont tousiours esté receus de l'Eglise Catholi-  
que. Il arriua en ceste Eglise vne chose merueil-  
leuse. Le iour de la feste de sainte Leocade, le  
roy receusinde y alla au seruire, accompagné  
des Seigneurs de sa Cour, l'Eglise estant toute  
pleine de Cleres & de seculiers, saint Ildefonse  
qui estoit lors Archeuesque de Toledo, se mit en  
prieres deuant le sepulchre de sainte Leocade:  
tout à coup la tombe, qui (comme dit Calixte)  
estoit si pesante, que trente hommes ne l'eussent  
seu leuer, s'ouurit d'elle-mesme, & la Vierge  
fortit de son sepulchre, laquelle regardant saint  
Ildefonse, le print par la main, & luy dit: O Il-  
defonse, la gloire de nostre Dame a esté mainte-  
nuē par toy, voulant dire qu'il auoit defendu la  
pureté de la virginité de marie mere de dieu,  
contre les heretiques qui la deschiroient par  
leurs langues viperines. Tous ceux qui les as-  
sterent tomberent par terre, estonnez de la nou-  
ueauté du prodige; mais saint Ildefonse parla  
hardiment à sainte Leocade en ces termes: O  
noble Vierge digne de regner au ciel avec dieu  
ayant mesprisé & donné vostre vie pour l'amour



de luy, que ceste ville est heureuse en laquelle vous estes née, que vous avez consacree par vostre presence. Regardez-la, Madame des Cieux où vous estes. Aidez de vostre intercession vos compatriotes, & le Roy qui solemnise deuotement vostre feste.

Après cela sainte Leocade commença à se retirer dans son tombeau, & saint Ildefonse couppa avec vne dague que le Roy luy bailla, vn bout du voile dont elle estoit couverte, en memoire d'vn si signalé miracle, qui est gardé encore à present dans la Sacrificie de Toledo. Le corps de sainte Leocade demoura long-temps dans la ville de Toledo en son sepulchre, & en vne belle eglise que le Roy Sisebut fit bastir: mais les Chrestiens craignans l'incurfion des Mores qui enuahissoient l'Espagne, le transporterent en la ville d'Ouiede, où l'on tient qu'il fut quelque temps, comme il s'en trouue des argumens certains dans la ville & dans l'Eglise. De là ce corps saint fut porté en Flandres, & mis dans vn Monastere de saint Gilten; de l'Ordre saint Benoist, nommé Cele, en la ville de Monts en Haynaut: De laquelle Translation le Docteur Iean Molan parle es Additiōs qu'il a escrites au Martyrologe d'Vsuard. On nescait pas au vray sur quel subiect il fut transporté en Flandres, ny en quel temps, ny par qui, Le bruit est, que ce fut vn grand Seigneur Flamand, qui vint au secours des Espagnols contre les Mores, & qu'vn Roy de Leon en recognoissance de ses agreables seruices, luy donna le corps de sainte Leocade, lequel fust reueré en ce Monastere de saint Gilten, de tous les peuples circonuoisins, qui receurent plusieurs grands bien-faits par son intercession, specialement contre la peste, dont ils estoient auparauant fort trauailliez: Iusques à ce que la royne Ieanne, fille & heritiere de Ferdinand, & Yfabelle mere de l'Empereur Charles le Quint estant Dame de Flandres par le mariage du Prince Philippe qu'elle espousa obtint de l'Abbé & des Religieux de Cele, l'an 1500. le 15. d'Octobre, la cheuille du pied droit de sainte Leocade, dōt elle fit present à l'Eglise de Toledo, cōme d'vn precieux thresor. En fin par vne grande prouidence & misericorde de nostre Seigneur ce corps saint fut apporté de ce Monastere où il estoit par l'autorité du pape Gregoire XIII. & de Philippe II. par vn pere Iesuite nommé michel Hermandes, & au bout de tant d'annees rendu à son pays, & à favielle de Toledo, dans la grande Eglise, où il fut solemnellement receu. Car outre les frais du voyage, & du sejour, pendant qu'on faisoit les preparatifs de son entree, qu'il fit dans l'Eglise de Iesus du mont de Laurence du Taicune (qui appartient aux Iesuites d'Alcala) où on le tenoit en grand apparat, comme semblablement par tous les chemins iusques à la ville de Toledo; la reception fut fort solemnelle, par la multitude du peuple qui s'y trouua, & la diuersité des reioüissances; & par la presence du Roy Philippe, du prince philippe son fils, & de l'Infante Yfabelle sa fille, & de l'Imperatrice Marie sa sœur, qui vin-

rent à toledo pour solemniser ceste feste, & porter sur leurs espales le corps de la sainte Vierge, se tenans bien-heureux de luy faire cēt humble seruire & honorable entree: Cela fut le 26. Aueil, l'an 1584. sous le Pape Sixte V. qui commanda que la feste de ceste translation fust celebrée en l'Eglise & Archeuesché de toledo.

*A Toledo en Espagne, sainte Leocade vierge, ayant long-temps demouré, & beaucoup endure en prison; du temps de Diocletian, par ordonnance de Dacian gouverneur d'Espagne, & entendant les gries & horribles tourmens que sainte Eulalie, & les autres martyrs enduroient, se print à prier, & comme elle estoit à genoux en oraison, rendit son ame à Dieu. A Carthage deceda S. Restitut Euesque & martyr, en la feste duquel S. Augustin fit vn beau sermon au peuple. En Afrique les saints martyrs Pierre, Sucesse, Bassian, Primitif, & autres vingt. A Limoges sainte Valere vierge & martyre. A Rome saint Procul Euesque, lequel durant la persecution de Diocletian, fut fouleté, battu à coups de bastons, chassé hors la ville, & puis restabli en son Eglise, où il mourut heureusement. A Paucie sainte Syrie premier Euesque dudit lieu, homme signalé pour ses miracles & vertus Apostoliques. A apamee ville de la Syrie; mourut saint Iulien confesseur, lequel du temps de l'Empereur seuer, fut fort renommé pour sa sainteté. A Perigueux S. Coprian abbé, qui a fait plusieurs miracles. A Nazianze sainte Gregoire sœur de S. Gregoire, surnommé le Theologien, qui a descrit ses vertus & miracles.*

LA VIE DE SAINT MELCHIADES, Pape & Martyr.



Saint Melchiades estoit Africain de nation, il succeda au pontificat à Eusebe: c'estoit vn tres-saint homme, qui endura de grands trauaux pour la gloire de nostre Seigneur, il deffendit aux Chrestiens de ieufner le Dimanche & le Teudy, de peur d'imiter les payens qui ieufnoient ces iours-là, & tenoient que ce ieufne estoit sacré, encore que depuis la cause de ne ieufner, les Teudys cessant, la prohibition fut leuee & ostee. Il y auoit à Rome plusieurs heretiques Manichees, le S. rape s'efforça de les reprimer & reduire au chemin de la verité: saint Melchiades escriuit vne lettre aux Euesques d'Espagne, en laquelle il dit, que tous les Apostres recogneurent la preeminence & superiorité de S. pierre & que le Sacrement de Baptesme est plus necessaire que celuy de la Confirmation, d'autant que sans le Baptesme personne ne peult estre sauué, neantmoins que le Sacrement de Confirmation de la part du Ministre est de plus grande dignité, parce qu'il n'y a que l'Euesque qui le puisse conferer. Après il met les effects de l'vn & de l'autre Sacrement, & traite auparauant des effects que le saint Esprit opera par sa venue sur les Apostres & ceux que recoiuent les Chrestiens au Baptesme & Confirmation. On celebra de son temps: selon que disent certains Autheurs, le Concile Prouincial de Neocesaree: auquel on establi quelque chose touchant l'estat de l'Eglise d'alors. Il fit vne fois les Ordres au mois de Decēbre, esquelles il sacra vnze Euesques, six prestres, & cinq Diacres. Et apres auoir saintement gouverné l'Eglise de nostre Seigneur deux ans, deux mois,